

KomuniKE Upravnog odbora Vijeća za implementaciju mira

Upravni odbor Vijeća za implementaciju mira na nivou političkih direktora sastao se sa visokim predstavnikom Wolfgangom Petritschem 6. i 7. maja 2002. godine u Sarajevu. Upravni odbor je izrazio zadovoljstvo što mu je pružena prilika za sastanak sa članovima Kabineta međunarodne zajednice. Upravni odbor je posebno pozdravio sastanak sa predstavnicima Bosne i Hercegovine pod vođstvom predsjedavajućeg Vijeća ministara, te premijerima dva entiteta, na kojem se razgovaralo – u duhu koncepta jačeg partnerstva između Visokog predstavnika i vođstva Bosne i Hercegovine – o gorućim pitanjima kao što su reforma pravosuđa, državne službe, koraci koji treba da uslijede nakon izmjena i dopuna entiteskih ustava te o zakonima o borbi protiv terorizma, te o državnom budžetu i pripremama za predstojeće opće izbore.

Upravni odbor konstatira da je u Bosni i Hercegovini učinjen značajan napredak za vrijeme trogodišnjeg mandata Wolfganga Petritscha, koji je obilježen slabljenjem nacionalizma i jačanjem tolerancije i multietničnosti. Upravni odbor zahvaljuje visokom predstavniku na uspješnom radu, čiji je cilj bio da potakne domaće vlasti da preuzmu odgovornost, da ojača državnost Bosne i Hercegovine, te unaprijedi društvene, ekonomске i kulturne uvjete života njenih građana. Upravni odbor također izražava zahvalnost za napore koje je učinio viši zamjenik Visokog predstavnika Matthias Sonn, u svjetlu činjenice da i on ovog ljeta napušta BiH.

Upravni odbor je ponovo naglasio potrebu za sveobuhvatnom reformom pravosudnog sistema i dao punu podršku toj reformi. Odbor pozdravlja namjeru Visokog predstavnika da osigura okončanje prve faze te reforme putem depolitizacije

reguliranja pravne profesije i uspostave ustanova za edukaciju pravosudnih radnika u oba entiteta, pod koordinacijom Visokog sudskog vijeća. Uspostava jedinstvenog Visokog sudskog vijeća će predstavljati osnovu za dalju reformu pravosuđa koja obuhvata i restrukturiranje sudskog i tužilačkog sistema. Upravni odbor poziva lokalne organe vlasti da osiguraju brzu uspostavu Suda Bosne i Hercegovine. Odbor podsjeća organe vlasti BiH da Žalbeno vijeće Suda treba da počne sa radom kako bi moglo donositi odluke o pritužbama vezanim za izbore. Od organa vlasti BiH također se zahtijeva da bez odlaganja pronađu trajno rješenje za problem smještaja Suda.

Upravni odbor pozdravlja pokretanje Sistema zaštite ličnih podataka građana (*Citizen Identification Protection System – CIPS*) koji će – kada se implementira, kao dio Sistema upravljanja informacijama u Bosni i Hercegovini – za organe vlasti BiH predstavljati dragocjeno sredstvo za borbu protiv međunarodnog terorizma, organiziranog kriminala i ilegalnih migracija. Upravni odbor još jednom naglašava potrebu za sveobuhvatnim, neodložnim i profesionalnim opredijeljenjem za poduzimanje proaktivnih mjera protiv terorizma, počevši od donošenja zakona i provođenja istrage protiv identificiranih pojedinaca i organizacija. Visoki predstavnik će preuzeti vodeću ulogu u koordiniranju pravnog okvira za borbu protiv terorizma.

Upravni odbor pozdravlja odluke o izmjenama i dopunama entitetskih ustava. Donošenje tih odluka omogućio je Sporazum Sarajevo-Mrakovica od 27. marta 2002. godine, koji je pokazao opredijeljenost političkih vođa BiH i entiteta da Bosnu i Hercegovinu učine istinski demokratskom i multietničkom državom. Odbor pozdravlja namjeru sadašnjih političkih vođa u BiH da izrade plan mjera za potpunu i brzu provedbu ovih amandmana, na osnovu najnovijih informacija koje su obezbijedili entitetski premijeri.

Upravni odbor pozdravlja porast povratka pripadnika manjinskih zajednica, koji je u 2001. godini prešao broj od 92.000, kao i

sličan pozitivan trend u prvom kvartalu 2002. godine. Odbor naglašava potrebu za daljom podrškom ovakvom trendu, uz obezbjeđenje odgovarajućih finansijskih sredstva iz domaćih i međunarodnih izvora, kako bi se, između ostalog, izgradio odgovarajući okvir za povratak izbjeglica i raseljenih lica. Upravni odbor također naglašava važnost provedbe imovinskih zakona, što je rezultiralo u rješavanju 46 posto svih registriranih zahtjeva do marta mjeseca 2002. godine, te apelira na organizacije koje se bave provedbom imovinskih zakona i organe vlasti da istraju u naporima koje čine na provedbi imovinskih zakona. U tom smislu, Upravni odbor podržava napore koje čini Državna komisija za izbjeglice i raseljena lica, u kojoj je ujedinjen angažman entiteta i međunarodne zajednice pod koordinacijom vlasti BiH. Povratci i ponovno preuzimanje imovine, na značajan način doprinose obnovi funkcionalnog društva u Bosni i Hercegovioni. Upravni odbor također očekuje brzu provedbu Sporazuma AREA koji su potpisali Zagreb, Sarajevo i Beograd pod pokroviteljstvom Pakta stabilnosti. Upravni odbor ističe da Sporazum Sarajevo-Mrakovica i izmjene i dopune entiteskih ustava koje slijede nakon njega naglašavaju obavezu entiteskih organa vlasti da učine sve napore u cilju pune provedbe Aneksa VII Općeg okvirnog sporazuma za mir, što je od izuzetne važnosti za cjelokupni proces pomirenja u Bosni i Hercegovini.

Upravni odbor pozdravlja blagovremen i profesionalan rad Izborne komisije Bosne i Hercegovine vezan za pripreme općih izbora koji su objavljeni za 5. oktobar ove godine. Uzimajući u obzir nedostatak finansijske podrške za Izbornu komisiju, Upravni odbor apelira na organe vlasti Bosne i Hercegovine i Vladu Federacije Bosne i Hercegovine da bez odlaganja ispune svoje zakašnjele finansijske obaveze prema Izbornoj komisiji. Upravni odbor podstiče sve političke stranke da uzmu učešća u izborima i to u skladu sa pravilima koja propisuje Izredni zakon Bosne i Hercegovine.

Upravni odbor Vijeća za implementaciju mira konstatira pomake

koje je učinila privremena upraviteljica Hercegovačke banke, te apelira da se poduzmu maksimalni napor u cilju što hitnijeg pozivanja na odgovornost svih koji su nanijeli štetu građanima, Federaciji i državi.

Upravni odbor pozdravlja današnje pokretanje informativnog programa Javnog RTV servisa (*Public Broadcasting Service – PBS*) za cijelu BiH. Odbor upućuje najljepše želje i podršku upravi i osoblju PBS-a, te ponovo naglašava svoju podršku strategiji Visokog predstavnika za restrukturiranje javnog rtv sistema sa ciljem uspostave takvog sistema na državnom nivou, za sve građane Bosne i Hercegovine. Upravni odbor je svjestan potrebe za donošenjem djelotvornih zakona koji će obezbijediti neovisan i održiv javni rtv sistem, u skladu sa standardima Vijeća Evrope, konstatirajući da je to i jedan iz ključnih uvjeta iz smjernica Evropske unije (*EU Roadmap*). Upravni odbor je svjestan potrebe za stvaranjem pravičnog i konkurentnog okruženja za razvoj privatnih medija u Bosni i Hercegovini. Upravni odbor konstatira da je Alijansa za promjene podržala sadašnji nacrt zakona, te apelira na Visokog predstavnika i Vijeće ministara da učine sve napore kako bi se što prije osigurala brza provedba zakona o javnom rtv sistemu u skladu sa evropskim standardima. Upravni odbor čestita Regulatornoj agenciji za komunikacije na uspješnom okončanju procesa izdavanja dugoročnih licenci za emitere. Ova teška i osjetljiva operacija je značajno doprinijela finansijskoj održivosti i programskim standardima u rtv sektoru u Bosni i Hercegovini.

Upravni odbor je odobrio zapisnik i preporuke sa sastanka finansijskih stručnjaka koji je održan 11. aprila 2002. godine u Sarajevu. Upravni odbor posebno navodi da je nađeno praktično rješenje za pitanje koje je postavila Evropska komisija, a koje je nazvano "Neraspodijeljena sredstva i nedostatni izvori finansiranja" u tekućem budžetu OHR-a. Odbor također konstatira da je na operativnom nivou nađeno praktično rješenje i za pitanje koje je vezano za prethodno, a odnosi se

na račune iz 2000. godine, koje Evropska komisija još uvijek nije odobrila. Ovo rješenje podrazumijeva da, kada se u julu finansijski stručnjaci sastanu da odobre račune iz 2001. godine,

Evropska komisija će imati priliku da odobri i račune iz prethodnog perioda. Upravni odbor zahtijeva od finansijskih stručnjaka da mu podnesu izvještaj o iznađenim budžetskim rješenjima.